

四庫全書

史部

欽定四庫全書

欽定續通志卷三十九

宋紀十五

度宗

度宗皇帝諱禛父昀嗣榮王理宗母弟也理宗在位
歲久無子乃屬意于帝初賜名益啓授貴州刺史歷慶
遠軍節度使封益國公旋改名牧進建安郡王寶祐元
年立為皇子

宗史作立為皇太子考理宗紀帝于寶祐元年始立為皇子即此下云為節度使為

郡王為國王則斷非為太子後事知此太子係衍文今刪改賜今名授崇慶軍節度

使開府儀同三司進封永嘉郡王又進忠王尋授鎮南
遂安軍節度使景定元年六月立為皇太子理宗家教
甚嚴鷄初鳴太子問安退即往會議所參決庶事已乃
入講堂講官以次講經史將晡復至榻前起居率以為
常理宗每問所講書答之是則賜坐賜茶否則為之反
覆剖析或繼以怒明日須更覆講五年十月丁卯理宗
崩遺詔太子于柩前即皇帝位戊辰尊皇后為皇太后

辛未大赦十一月丙戌帝初聽政御後殿命馬廷鸞留
夢炎兼侍讀李伯玉陳宗禮范東叟兼侍講何基徐夔
兼崇政殿說書詔求直言又詔先朝舊臣趙葵謝方叔
程元鳳馬光祖李曾伯各上言以匡不逮召江萬里王
爚洪天錫湯漢等赴闕詔躬行三年喪復濟王竑元贈
少師節度使追封鎮王加封嗣榮王與芮武康寧江軍
節度使依前太師判宗正事詔撫勞邊防將士戊戌詔
儒臣日侍經筵輔臣觀講十二月辛丑詔改明年為咸

淳元年壬寅戒賊吏絕貢羨餘是歲兩浙江東西湖南
北廣東西福建成都京西潼川夔利路戶五百六十九
萬六千九百八十九口一千三百二萬六千五百三十
二大理寺奏大辟三十三人

咸淳元年春正月辛未朔日有食之丞相賈似道請為
總護山陵使不允尋下詔獎諭甲戌免臨安征商三月
二月庚申置籍中書記諫官御史言事歲終以考成績
三月癸酉似道乞解機政不允甲申葬理宗皇帝于永

穆陵夏四月壬寅賞四川都統咎萬壽雲頂山金堂峽之功丁未以壽崇節免臨安官私房儼地錢戊申乾會節如上免徵再免在京征商三月自是祥慶災異寒暑皆免戊午賈似道特授太師己未如景靈宮發米贍京城民叙夔路都統王勝等李市沙坪戰功五月己巳追命史彌遠為公忠翊運定策元勳閏月乙巳以久雨減直糶米濟京城民自是米價高即發廩平糶以為常丁未發錢贍在京小民及殿前步馬司軍人自是行慶恤災或靈

雨雪寒咸賜如上數以江萬里參知政事王爚同知樞
密院事權參知政事馬廷鸞端明學士簽書樞密院事丁
卯以故成都馬步軍總管張順歿于王事詔贈官五轉
秋七月壬戌督州縣嚴錢法禁民間用牌帖癸亥禁在
京置窠柵私繫囚八月丁亥禁有司收民租掬克甲午
蒙古將阿珠帥大軍至廬州及安慶諸路統制范勝統
領張林正將高興副將孟興逆戰死之九月壬子命宰
執訪司馬光蘇軾朱熹後人量才錄用冬十月壬申減

四川州縣鹽酒課始自景定四年再免徽三年乙亥減田契稅錢什四

二年春正月癸丑以江萬里為湖南安撫使兼知潭州
二月戊寅免湖南漕司積年運上峽米耗折逋直三月
庚子賞夔路總管張喜等防護開達軍功戊申賜敕書
獎諭呂文德夏四月乙丑洪天錫以顯文閣待制知潭
州兼湖南安撫使五月癸丑詔諸節將討軍實節浮費
毋占役兵士致妨訓練六月壬午賑衢州饑秋八月甲

申安南國遣使賀即位戊子蒙古入蘄州黃州冬十一月乙卯少師致仕趙葵薨丁巳利東安撫使知合州張珏復廣安大梁城十二月丁丑申戡貪之令

三年春正月己丑朔有事于南郊大赦癸卯立妃全氏為皇后戊申帝詣太學謁孔子行舍菜禮以顏淵曾參孔伋孟軻配享顓孫師升十哲邵雍司馬光升列從祀雍封新安伯祭酒陳宜中以下加恩有差乙丑詔賈似道以太師平章軍國重事一月三赴經筵三日一朝治事

都堂三月癸卯知房州李鑑及將校杜汝隆等以戰
龍光若有功優與旌賞夏五月丁亥朔日有食之六月
壬戌加授呂文德少傅馬光祖參知政事李庭芝兵部
尚書並職任仍舊秋七月壬辰權鄂州都統汪政焚光
化城外積聚及攻真陽有功詔與轉官己酉權黎州張
午招諭大青羌主歸義八月辛酉遣步帥陳奕率馬軍
舟師巡邏江防壬戌以邊報警急詔呂文德等申嚴防
遏乙丑太師武康寧江軍節度使嗣榮王與芮進封福

王主榮王祀事壬申以久雨命決滯獄九月乙未詔郡縣收民租母取贏違者論罪癸卯知邕州總統譚淵等改建水州禽其知州阿孱以下三百餘人冬十月庚申復開州十一月丙申故左丞相吳潛追復光祿大夫壬寅賞知房州李鑑等均州武陽琪戰功十二月丙辰呂文煥依舊帶行御器械知襄陽府兼京西安撫副使

四年春正月己丑蒙古于白河口萬山鹿門山諸處興築城堡詔知郢州程貴兩淮都統張世傑申嚴備禦

己酉印應雷改知慶元府兼沿海制置使夏四月壬午以湯漢為福建安撫使丙申右正言黃鏞言今守邊急務非兵農合一不可一曰屯田二曰民兵川蜀屯田為先民兵次之淮襄民兵為先屯田次之此足食足兵良策也不報五月辛酉樞密都承旨高達再辭侍衛都虞候以孫虎臣代之丙子賈似道乞骸骨不允六月辛巳罷浙西諸州公田莊募民以耕輸租減什三毋私相易違者以盜賣官田論秋九月丁巳蒙古將阿珠攻樊城

冬十月戊寅朔日有食之己亥詔四川州縣鹽酒課自咸淳四年始再免徵三年十一月丁巳以知江陵府陳奕裨將周全王德等與蒙古戰于西山南谷口田家山有功各以等第推賞壬申行義役法十二月辛卯以夏貴為沿江制置副使兼知黃州戊戌以汪立信知潭州兼湖南安撫使職任依舊乙巳詔賞京湖總管張喜趙萬等石門坂堰戰功

五年春正月丁未以李庭芝為兩淮安撫制置大使兼

知揚州蒙古將阿珠入復州及德安府京山壬子京湖
策應司參謀呼延德領諸將張喜等與蒙古戰于蠻河
癸亥葉夢鼎依前少保判福州福建安撫使封信國公
以馬廷鸞參知政事兼同知樞密院事甲戌以江萬里
參知政事三月丙午阿珠自白河以兵圍樊城己未詔
浙西六郡公田設官督租有差辛酉京湖都統張世傑
率馬步舟師援襄樊戰于赤灘圍戊辰以江萬里為左
丞相馬廷鸞為右丞相兼樞密使己巳以馬光祖知樞

密院事兼參知政事吳革沿江制置使夏四月丙子賞
張世傑戰功壬午知渠州張資上蓬州界白土神山蒲
渡等處戰功丙戌以安西都統張朝寶利東路安撫張
珏水磴頭戰功推賞己丑劉雄飛依舊樞密都承旨知
沅州兼常德澧辰沅靖五郡鎮撫使五月己酉馬光祖
以觀文殿學士提舉洞霄宮乙卯程元鳳薨壬戌以信
陽軍將婁安邦朱興戰千石畝呂文煥呼延德戰福山
楊青李忠戰石湫俱有功推賞有差壬申京湖制司言

故夔路安撫徐宗武沒于王事詔于致仕恩外特官其一子六月庚辰以呂文福為復州團練使知濠州蕪淮西安撫副使甲申皇子昱生秋七月己酉觀文殿學士馬光祖守本官致仕八月戊寅詔郡縣收民租毋巧計取贏毋厚直折納犒襄樊將士九月辛酉祀于明堂大赦冬十月己丑呂文德進封崇國公十一月戊辰特授少師進封衛國公致仕十二月癸酉文德卒己卯以范文虎為殿前副都指揮使甲申犒襄郢等處水陸戍

士戊子蒙古兵築南新城夏貴與戰敗績范文虎來援亦敗阿珠進逼襄陽

六年春正月壬寅以李庭芝為京湖安撫制置使兼夔路策應使印應雷兩淮安撫制置使己酉以錢賜夔路策應司備賞給庚戌以高達為湖北安撫使知鄂州孫虎臣起復淮東安撫副使知淮安州戊辰以江萬里為福建安撫使二月乙未夏貴攻萬山堡為蒙古將張弘範所敗丁酉呂文福為淮西安撫副使兼知廬州已

亥朱禩孫權兵部尚書仍四川安撫制置總領夔路轉
運知重慶府三月庚子朔日有食之癸丑詔舉廉吏癸
亥立贛吉南安境要衝四砦聯絡禦寇夏四月戊寅以
文天祥兼崇政殿說書五月辛丑以吳革為沿江制置
宣撫使五月蒙古攻嘉定及重慶府都統牛宣等與戰
于釣魚山及馬湖口兩戰皆敗宣被執六月戊寅賈似
道辭退疏十數上帝堅留之庚寅賜襄郢水陸屯戍將
士秋七月復開州八月壬辰詔推排法虛加寡弱戶田

租害民為甚亟除其弊癸巳詔賈似道十日一朝九月
庚戌以黃萬石為沿海制置使丙寅范文虎援襄陽劉
整逆戰于灌子灘敗之冬十月丁丑詔范文虎總統殿
司兩淮諸軍往襄樊會合備禦己卯詔台州發義倉并
豐儲倉米振水災甲申以陳宗禮趙順孫兼權叅知政
事閏月己酉以安吉州水免公田租乙亥夏費攻莒州
十一月丁丑以嘉興華亭兩縣水免公田及民田租庚
辰犒襄郢屯戍將己丑都統張世傑領兵江防十二月

蒙古築萬山城襄樊路絕

七年春正月封子昱為建國公詔戒貪吏辛未以諸暨縣水免其租三月戊寅振和州無為鎮巢安慶諸州饑乙酉振平江府及吉州饑仍減直振糶戊子發米往建德府濟糶夏四月辛亥免廣東提舉司鹽籜銀甲寅禮部侍郎陳宜中以顯文閣待制出知福州兼福建路安撫使五月蒙古侵嘉定重慶瀘汝諸州郡壬辰發米詣衢州振糶六月癸巳以韓震帶行御器械知江安州兼

潼川東路安撫副使馬堃帶行御器械知咸淳府節制涪萬州丙申振諸暨縣被水民癸卯范文虎以舟師援襄陽阿珠逆擊之文虎敗走

據元史增輯

癸丑以隆暑賜襄

郢屯戍將士戊午振紹興府饑秋七月乙酉來興國攻百丈山營敗歸八月壬辰朔日有食之甲午遣京湖制置李庭芝詣郢州犒師九月己丑子熈生冬十月丙申少傅嗣秀王與澤薨己未振殿前步馬諸軍貧乏及陣沒孤遺者十二月丙午命四川制司下渠洋開州寧西

鎮撫使張朝寶劾司獠師已亥謝方叔叙復元官以惠國公致仕辛亥初置士籍是年蒙古改國號曰元

八年春正月庚申詔崇儉自宮禁始自今珠翠銷金不得服用辛未子昂生己丑湯漢卒二月癸巳謝方叔卒前知台州趙子寅歿無所歸特贈直秘閣給田宅以旌廉吏丙午獠襄郢水陸戰戍將士夏五月乙巳李庭芝援襄陽移屯郢州遣民兵部轄張順張貴將死士自上流直犯重圍張順死之貴尋被執亦死六月丙申皮龍

榮徙衡州丁酉以章鑑為端明殿學士同簽書樞密院
事命京湖制司糴米轉輸襄陽府乙巳以家鉉翁兼權
知紹興府浙東安撫提舉司事辛亥罷廣東運司銀場
癸丑命四川制司詣湖北糴運上峽入夔米秋八月丙
戌朔日有食之丁未振紹興府六縣被水民九月辛未
祀于明堂賈似道乞罷政帝固留之大赦甲戌元師攻
開州又攻合州冬十月己亥減會稽餘姚上虞諸暨蕭
山五縣田租丁未以章鑑兼權參知政事庚戌減錢塘

仁和兩縣民田租什二會稽湖田租什三諸暨湖田租
盡除之十一月乙卯右丞相馬廷鸞以觀文殿學士知
饒州振殿前步馬司諸軍貧窶并陣沒孤遺者已卯遣
使如元師授劉整為盧龍軍節度使封燕郡王十二月
甲寅以葉夢鼎為少傅右丞相兼樞密使

九年春正月乙丑元師克樊城范天順牛富死之癸未
詔叙安豐統制金文彪朱文廣王文顯盛全泚河古河
泉河玘河等處戰功二月丁未以夏貴檢校少保庚戌

呂文煥以襄陽府叛降于元三月庚申賈似道請出督師詔不允劉整故吏羅鑑自北還上整書橐取江南二策詔淮東制司亟于清口築城以備之庚午遣金吾衛上將軍阮思聰由平江鎮江及黃州行視城池戊寅賈似道始奏襄陽失陷壬午建機速房以革樞密院漏泄兵事稽違邊報之弊賈似道累疏請督師詔勉留夏四月甲申以汪立信權兵部尚書京湖安撫制置使知江陵府夔路策應使湖廣總領不許辭免仍給錢令開闢

犒師辛卯以趙潛為淮西總領兼沿江制置建康留守
壬辰詔襄陽六年之守一旦而失軍民離散痛切朕心
今年乾會節其免集英殿宴以錢六十萬給沿江制置
趙潛江防捍禦癸巳知招信軍陳巖乞祠祿詔曰迺者
邊吏弗戒致有襄難將士頻歲暴露邊方蕩析離居盡
傷朕心爾閩臣專征方面宜身率諸將宣揚國威以賞
戮用命不用命爾守臣有土有民宜申傲國人保固封
守爾諸將尚迪果毅一乃心力各以其兵敵王所愾今

朕多誥爾其悉聽明訓毋懈毋悞習于故常功多有厚
賞爾不克用勸罰固不得私也又如中外小大臣僚有
材識超卓明控御之宜懷攻守之略者密具以聞一如
端拱二年制書朕當虛心以聽丁未以高達為寧江軍
節度使湖北安撫使知峽州李庭芝辭赴闕詔與祠已
酉以夏貴兼侍衛馬軍都指揮使庚戌詔汪立信賞罰
調用悉聽便宜行事是月元主檄史天澤等乘機進兵
五月乙卯以黃萬石權戶部尚書兼知臨安府浙西安

撫使丙辰知廬州呂文福以從兄文煥降元乞罷不允
呂師夔亦五疏乞罷詔赴闕戊寅孝感縣丞關應庚上
書言邊防二十事詔授武當軍節度推官京湖制司量
材任使庚辰布衣林椿年等上書言邊防十數事詔諸
人上書凡請以丞相似道督師者不允餘付機速房六
月前四川宣撫司參議官張夢發詣賈似道上書陳危急
三策似道不以聞下京湖制司審度可否事竟不行左
藏東庫寔材望上書言邊事不報戊子京湖制司請給

器械詔內軍器庫選賜之仍給錢備修繕己丑給事中
陳宜中乞正文虎不力援襄之罰詔文虎降一官依
舊知安慶府閏月辛亥以殿前指揮使陳奕總統舟師
備鄂州黃州江防丙辰前臨安府司法梁炎午陳攻守
之要五事不報命大理寺丞鍾蜚英點視沿江堡隘兵
船戊辰賞馬湖蠻王汝作鹿巫蠻王沐立助官軍捍禦
馬湖功秋七月丁亥權紹興府節制紫城軍義文榮鼎
及將趙居敬等成都之役沒于兵各追贈官秩仍官其

子癸已知達州趙章知開州鮮汝忠知渠州張資等復
洋州又復吳勝堡戊戌張珏等復馬驥山八月癸丑權
知均州徐昂總管盛聰戰房州胡師峪板倉乙卯知房
州李鑑調權竹山縣王國材統制熊權總轄馬宗明戰
落馬坪白羊山各以功論賞九月辛巳以章鑑簽書樞
密院事兼參知政事陳宜中同簽書樞密院事乙未以
洪燾為浙東安撫使丙申以黃萬石為湖南安撫使冬
十月癸丑鎮巢軍和州太平州諸將查文等以射湖岡

萬歲嶺後港及焦湖北岸戰功咸賜爵賞丁丑兩淮制
置使卽應雷進二秩致仕以李庭芝為兩淮安撫制置
使并給錢激犒備禦十一月壬午封子焘為嘉國公甲午
以陳奕為沿江制置使知黃州呂文福知閤門事分淮東
西制置為兩司以李庭芝為淮東安撫制置使仍兼淮
西策應使乙未以夏貴為淮西安撫制置使兼知廬州
仍給錢激犒備禦李庭芝辭免淮西策應使不允知安
豐軍陳萬以舟師抵正陽城遇蒙古兵擊敗之十二月

甲寅夏貴改正陽敗還甲子以馬廷鸞為浙東安撫使
知紹興府丁丑以旱澇免沿江制置使所轄四郡屯田

租

十年春正月壬午城鄂州漢口堡權總制施忠部將熊
伯明知秦州龔溥以天長縣東橫山秦潼湖青蒲口等
處戰功推賞戊子江萬里以觀文殿大學士提舉洞霄
宮乙丑以留夢炎知潭州兼湖南安撫使庚寅城鄂州
沌口西岸堡襄陽勇信中軍鈐轄吳信自呂文煥軍來

歸詔赴闕丙申減江東沙圩租什之四是月賈似道母
死歸治喪即起復二月己酉以趙順孫為福建安撫使
三月己卯免郡縣侵負義倉米夏四月乙卯子昺進封
永國公詔賞沿江都統王達黃侯戰黃連寺之功戊午
以呂文福為常德辰沅澧靖五郡鎮撫使知沅州辛酉
詔賞光州守陳岩路分李全許彥德總管何成路鈐仰
子虎等牛市販丁家庄戰功烏蘇蠻王詣雲南軍前納
款于元五月丁亥以高世傑為湖北安撫副使兼知岳

州總統出戍軍馬六月戊午命壽春府措置邊防秋七

月癸未皇帝崩于福寧殿

宋史此處有遺詔太子顯即皇帝位之語考帝顯以嘉國

公即位未曾立為太子也且其事已具帝顯紀茲并刪之

年三十五

據甲子會紀增輯

謚曰

端文明武景孝皇帝廟號度宗攢于永紹陵

度宗咸淳十年

欽定續通志卷三十九

欽定四庫全書

欽定續通志卷四十

宋紀 十六

帝熈 二王附

帝熈度宗皇帝子也母全皇后初授左衛上將軍封嘉國公咸淳十年七月癸未度宗崩賈似道入官議所立衆以時方多難而建國公是年長欲立之似道主立嫡乃稱遺詔奉帝卽皇帝位於樞前年甫四歲謝太后臨

朝稱詔甲申以兄昱為保康軍節度使進封吉王弟晃
保寧軍節度使封信王並開府儀同三司加食邑命平
章賈似道依文彥博故事獨班起居丙戌尊皇太后曰
壽和聖福太皇太后皇后曰皇太后戊子命臨安府振
瞻細民辛卯以朱禩孫為京湖四川宣撫使兼知江陵
府壬寅詔撫三邊將士命州郡舉遺逸求直言除浙西
安撫司兩浙轉運司臨安府見進贓賞錢八月甲辰詔
乞言於老臣江萬里葉夢鼎馬廷鸞留夢炎趙順孫王

燾甲寅太皇太后以老不能御正衙命暫以慈元殿為
後殿戊辰以全清夫為昭信軍節度使謝堂檢校少保
謝垕保康軍節度使馬廷鸞乞歸詔趣之任九月丁丑
王燾乞致仕詔不允戊寅賑餘杭臨安兩縣水災己卯
似道乞免答拜從之癸未元兵大會于襄陽丙戌分道
並進丁亥薄郢州戊子免被水州縣今年田租丁酉以
天瑞節免徵臨安府公私房賃錢十日以金銀符給夏
貴激賞竒功壬寅復州副將翟國榮與元兵戰于爛泥

湖死之冬十月丙午元兵破渠州禮義城知州張資自
殺癸丑廣西經畧司權參議官邢友龍擊潮州漳州寇
破之乙卯令州縣行義田義役丁巳元兵至郢州都統
制張世傑力戰却之遂去由藤湖入漢戊午郢州副都
統趙文義追之與戰于全子湖死之壬戌以錢給郢城
屯戍將士甲子詔以明年為德祐元年乙丑以章鑑同
知樞密院事兼權參知政事陳宜中簽書樞密院事兼
權參知政事元兵徇沙洋城京湖宣撫司遣總管王虎

臣援之丙寅城破虎臣與守隘官王大用皆被執元兵
至新城戊辰總制黃順出降己巳副總制仁寧出降都
統制邊居義力戰城陷死之知復州翟貴以城降十一
月癸酉以朱禩孫為京湖四川宣撫使丁丑命沿江制
置使趙潛巡江策應仍賜錢激賞戰功戊寅馬廷鸞力
辭浙東安撫使詔依舊觀文殿大學士提舉洞霄宮庚
辰以陸秀夫為淮東安撫制置司參議官丙戌以王爚
為左丞相章鑑為右丞相並兼樞密使以張晏然兼京

湖四川宣撫司參議官甲午括邸第戚畹及御前寺觀
田令輸租是月元人拔雲安羅拱高陽諸城堡十二月
癸卯振建康府大平州池州避難民賜京湖及沿江戍
守將士甲辰以淮西四郡水旱免去年屯田未輸之租
丙午元兵次漢口遂入江丁未提舉興國宮呂師夔募
兵江州癸丑元兵攻陽邏堡武定軍都統制王達戰死
乙卯元兵渡青山磯丙辰都統程鵬飛與戰不利都統
高邦憲被執元兵復攻夏貴于陽邏堡都統制劉成戰

死夏貴遁歸廬州朱禛孫至鄂州聞夏貴敗夜奔江陵
府己未權知漢陽軍王儀以城降呂文煥以元兵攻鄂
州庚申程鵬飛及權守張宴然以城降癸亥詔似道都
督諸路軍馬以步軍指揮使孫虎臣總統諸軍所辟官
屬皆先命後奏詔天下勤王甲子起李芾為湖南提刑
乙丑以高達為湖北制置使兼安撫知江陵府詔覈貴
戚釋道田租以助邊費庚午程鵬飛以元兵徇黃州知
州陳奕叛降于元李庭芝以兵勤王辛未命州郡節制

駐戍經從兵

德祐元年春正月癸酉元兵入黃州甲戌陳奕陷蘄州
丁丑知州管景模叛降于元戊寅詔出浙東卽第米減
糶壬午葬度宗皇帝于永紹陵癸未賈似道以呂師夔
權刑部尚書都督府參贊軍事任中流調遣乙酉以陳
宜中同知樞密院事兼參知政事呂師夔錢真孫遣人
請降于蘄州丙戌元兵徇江州知安東州陳巖遁邳州
降戊子知南康軍葉闓遣人請降于江州賈似道出師

知德安府來興國叛降元夔路安撫張起巖攻開州復
取之己丑知安慶府范文虎遣人以酒饌迎元師于江
州乙未以孫虎臣為寧武軍節度使戊戌赦京畿罪池
州都統張林遣人請降於江州元兵入安慶范文虎降
通判夏椅死之是月知達州鮮汝忠以城降元二月癸
卯似道以宋京為都督府計議官使于元軍甲辰以黃
萬石為江南西路制置使加湖北制置副使高達檢校
少保庚戌元兵入池州權守趙卯發死之乙卯五郡鎮

撫呂文福遣所部淮兵入衛丙辰詔勞賈似道命都督
府歲舉改官如史嵩之故事己未加張起巖福州觀察
使庚申孫虎臣與元兵戰于丁家洲敗績似道虎臣奔
揚州諸軍盡潰翁應龍以都督府印奔還行在壬戌元
兵徇饒州知府唐震死之故相張萬里赴水死通判萬
道同以城降元沿江制置大使趙潛知鎮江府洪起畏
知寧國府趙與可知隆興府吳益皆棄城遁知和州王
喜以城降元建康都統翁福出迎元師甲子元兵至臨

江軍知軍鮑廉死之似道上書請遷都乙丑下公卿雜
議王燾去位張世傑將兵入衛道饒州復攻取之其將
謝元王海李旺袁恩呂再興皆戰死江西提刑文天祥
起兵勤王丙寅以天祥為江西安撫副使知贛州趣入
衛詔募兵以謝堂為兩浙鎮撫使謝至保寧軍節度使
全永堅謝屋並檢校少保戊辰徵兩浙福建諸郡廂禁
兵之半入衛湖南提刑李芾以兵勤王知江陰軍鄭孺
棄城遁知無為軍劉權知太平州孟之縉皆以城降元

已巳元兵攻嘉定九頂山都統侯興戰死以陳宜中知樞密院事兼參知政事曾淵子同知樞密院事兩浙安撫制置大使兼知臨安府文及翁簽書樞密院事倪普同簽書樞密院事召王爚為浙西江東宣撫招撫大使使居京師以備咨訪遣元使人郝經等歸庚午加夏貴開府儀同三司令以所部兵入衛令長吏給經過兵民錢米免一切征稅應編配拘鎖人除偽造闖會劫盜放火者悉縱之放免浙西公田逋米及諸處見監贓文武官

在謫籍者並放自便與叙復加張珏寧遠軍節度使咎
萬壽保康軍節度使張世傑和州禦防使令將兵入衛
罷賈似道平章都督予祠招似道潰兵辛未右丞相章
鑑遁三月壬申朔詔復茶鹽市舶法除似道諸不恤民
之政以公田給佃主率其租戶為兵陳宜中殺殿前指
揮使韓震震所部兵叛攻嘉會門急發兵捕之皆散走
癸酉都統徐旺榮迎元兵入建康府鎮江統制石祖忠
請降于建康命浙西提刑司準備差遣劉經戍吳江兩

浙轉運司準備差遣羅林浙西安撫司參議官張濡戍
獨松關山陰縣丞徐垓正將郁天興戍四安鎮起趙淮
為大府寺丞戍銀樹東壩湖北安撫司計議官吳繼明
復通城縣遣使召章鑑還朝甲戌以賈似道為醴泉觀
使元兵至無錫知縣阮應得出戰死之乙亥詔諭呂文
煥陳奕范文虎使通和議息兵以王爚為左丞相兼樞
密使丙子下詔罪己以陳宜中為特進右丞相兼樞密
使罷章鑑官予祠侍御史陳過請竄賈似道併治其黨

人翁應龍等不俟報而去丁丑知滁州王應龍以城降
元己卯杖翁應龍刺配吉陽軍命王燦陳宜中並都督
諸路軍馬加呂文福福州觀察使壬午知常州趙與鑒
遁常州陷甲申元兵至西海州安撫丁順降乙酉知東
海州施居文乞降於西海州知平江府潛說友通判胡
玉林鏜以城降元加張世傑保康軍承宣使總都督府
諸軍丙戌知廣德軍令孤概以城降元張世傑遣其將
閻順李存進軍廣德謝洪永進軍平江李山進軍常州

己丑滁人執王應龍歸於揚州殺之加呂文福保康軍承宣使趣入衛文福殺使者入江州降于元庚寅左司諫潘文卿右正言季可同知樞密院曾淵子兩浙轉運副使許自浙東安撫王霖龍相繼遁去簽書樞密院文及翁同簽書樞密院倪普諷臺臣劾己章未上亟出關遁知安東州孫嗣武以城降元辛卯命在京文武並轉兩官其畔官而遁者令御史臺覺察以聞閩順戰安吉縣復取鳳平張濡殺元使者嚴忠範於獨松闕執廉希

賢送行在

謹按通鑑輯覽

批元兵既已渡江其局固非乞和可了兩軍相對使行其間乃行人甫入境遽以兵刃相加實非情理所宜使宋果有良將勁卒可以制勝或者猶可今並無可自恃者而冒昧橫挑敵怒旋又思餌以甘言更與兒戲何異元人豈肯為宋所愚謀國者錯謬若此尚何所恃以圖存乎

壬辰岳州安撫張世傑降於元

癸巳元人攻岳州總制孟之紹以城降乙未免安吉縣

今年夏田租丙申顧順復廣德軍以陳合同簽書樞密

院事戊戌赦邊城降將罪能自拔歸者錄之復一州者

予知州復一縣者予知縣所部僚吏將卒及土豪立功

者同賞罷章鑑祠官并奪宰輔恩數曾淵子削兩官奪
執政恩數陳過陳堅徐卿孫各削兩官奪侍從恩數趙
與鑒追兩官罷之遇赦永不收叙罷許自王霖龍夏四
月壬寅統制洪福復鎮巢軍乙巳元兵入廣德知縣王
汝翼與寓居官趙時晦路分孟唐老與其二子死之丙
午元兵破沙市城都統孟紀死之監鎮司馬夢求自經
死戊申京湖宣撫朱禩孫湖北制置副使高達以江陵
降元京湖北路相繼皆陷張起巖保飛山己酉命劉師

勇戍平江府壬子以高斯得簽書樞密院事兼權參知政事總統張敏與元兵戰於豐城死之乙卯以福王與芮為武康寧江軍節度使判紹興府丙辰王爚至今如文彥博故事自朝參起居外並免拜以樞密副使召夏貴提兵入衛丁巳總制霍祖勝復溧陽縣乙未文及翁倪普並削一官奪執政恩數潛說友削三官奪侍從恩數庚申令狐概除名配鬱林州牢城籍其家知金壇縣李成大率義局官含山縣尉胡傳心陽春主簿潘大同

濠梁主簿潘大恠進士潘文孫潘應奎復金壇縣鎮江
統制侯岩縣尉趙嗣濱復以元兵攻之成大二子及大
同等皆死成大被執死之壬戌元兵攻真州知州苗再
成宗子趙孟錦與戰于老鶴嘴敗績癸亥加知思州田
謹賢知播州楊邦憲並復州團練使趣兵入衛丁卯加
李庭芝參知政事戊辰詔宜興溧陽民兵助戰有功特
免今年田租庚午元兵趨揚州都撥發官雷大震出戰
死是月常德鼎澧皆陷五月辛未朔命宰執日赴朝堂

治事以旌德縣城守有功免其民今年田租癸酉元兵
至寧國知縣趙與糖出戰死之甲戌淮安總制李宗榮
知慶遠府仇子真將兵來勤王乙亥加苗再成濠州團
練使趙孟錦揚州都統司計議官以洪福知鎮巢軍丁
丑詔趙潛統軍民船屯江陰劉師勇復常州戊寅淮東
兵馬鈐轄阮克已將兵來勤王加左驍騎中郎將己卯
詔與婺州處士何基王栢贈諡

謹按通鑑輯覽

御批是時宋之君臣救亡之不暇尚從容為崇儒重
道之舉此與宋襄臨戰談古何異真可笑可哀耳
加張珏

檢校少保四川制置副使知重慶府辛巳加劉師勇濠
州團練使辛卯貶潛說友南安軍吳益汀州並籍其家
罷李珣送婺州籍呂文煥孟之縉陳奕范文虎家甲午
饒信州饑令民入粟補官丙申詔張世傑張彥阮克已
仇子真四道出兵遣使告天地宗廟社稷諸陵宮觀已
亥勞軍吳繼明復蒲圻通城崇陽三縣加帶行帶御器
械權知鄂州令擇險為寓六月庚子朔日有食之咎萬
壽以嘉定及三龜九頂紫雲城降于元知叙州李演援

嘉定戰于羊雅江兵敗被執辛丑太皇太后詔削尊號
聖福字以應天戒命侍從官已上各舉才堪文武者五
人餘各舉三人雖在謫籍亦聽舉之己酉免廣德軍今
年田租及諸郡縣未納綱解庚戌削章鑑一官放歸田
里曾淵子再削一官徙吉州誅翁應龍籍其家甲寅留
夢炎入朝王燾請相夢炎乞以經筵備顧問陳宜中請
相夢炎乞祠詔以燾為平章軍國重事一月兩赴經筵
五日一朝宜中左丞相兼樞密使都督諸路兵夢炎右

丞相兼樞密使都督諸路兵乙卯詔求言知叙州郭漢傑以城降元丙辰疏決在京罪囚戊午知瀘州梅應春以城降元己未以李庭芝知樞密院事兼參知政事庚申知富順監王宗義以城降元丙寅揚州都統姜才襲元兵于揚子橋敗績秋七月庚午江西制置黃萬石移治撫州詔還龍興府辛未張世傑督諸軍與元人戰于焦山下敗績壬午以饒州被兵令免今年田租路鈐劉用調兵入靖州知州康玉劫之通判張起巖殺玉復靖

州癸未拘內司局錢餉兵丙戌令權糴公田庚寅謫賈
似道為高州團練使貶循州籍其家糴浙西邸第寺觀
田米十之三監司郡守避事不即到官者令御史臺覺
察以聞辛卯京學生劉九臯等上書劾陳宜中宜中徑
去遣使四輩召之不至謝堂乞罷兩浙鎮撫司不從張
世傑乞濟師不報壬辰下劉九臯等于臨安獄罷王爚
為醴泉觀使癸巳以夏貴知揚州朱煥知瀘州甲午遣
使召陳宜中還朝乙未以陳文龍同簽書樞密院事兼

權參知政事戊戌遣使召宜中還朝八月己亥總制毛獻忠將衢州兵入衛辛丑疏決臨安府罪囚壬寅右正言徐直方適加夏貴樞密副使兩淮宣撫大使李芾湖南鎮撫大使乙巳吳繼明復平江縣己酉拘閩貴妃集慶寺賈貴妃演福寺田還安邊所庚戌劉師勇攻呂城破之丁巳遣使召陳宜中還朝加張世傑神龍衛四廂都指揮使總都督府諸兵戊午加劉師勇和州防禦使甲子以文天祥為浙西江東制置使兼知平江府九月

己巳陳宜中授觀文殿大學士醴泉觀使兼侍讀辛未
加田謹賢福州觀察使楊邦憲利州觀察使趣入衛己
卯陳宜中乞任海防不允辛巳有事于明堂大赦丙戌
命文天祥為都督府參贊官總三路兵會稽縣尉鄭虎
臣誅賈似道于漳州元兵陷泰州知州孫虎臣死之庚
寅免靖州今年田租乙未冬十月己亥加張世傑沿江
招討使劉師勇福州觀察使總統出戍兵壬寅陳宜中
至丁未以留夢炎為左丞相陳宜中為右丞相並兼樞

密使都督城臨安辛亥以張世傑為沿江制置副使兼
知江陰軍兼浙西策應使戊午領戶部財用常楙中書
舍人王應麟請立濟王後壬戌元兵發建康癸亥張全
尹玉麻士龍援常州士龍戰死全奔五牧朱煥至廬州
夏貴不納復以煥為淮東制置副使甲子尹玉與元兵
戰于五牧死之張全遁丙寅趙潛趙與可鄭孺所募
兵詔中外官有習兵畧者各以書來上是月李世修以
江陰降于元十一月丁卯銅關將貝寶胡岩起攻溧水

死之庚午以陳文龍同知樞密院事兼權參知政事黃
鏞同簽書樞密院命諸制司各舉才堪將帥者十人不
限偏裨士卒不隸軍中者許投匱自薦辛未起居舍人
曾唯辭官不允徑去戊寅元兵破廣德軍已卯破四安
鎮正將胡明等死之召文天祥入衛壬午元兵至隆興
府黃萬石棄撫州遁轉運判官劉槃以城降元癸未元
兵破興化縣知縣胡拱辰自殺元兵陷常州屠之知州
姚訔通判陳焄都統王安節皆死劉師勇奔平江乙酉

禮部侍郎陳景行辭官不允徑去丁亥獨松關告急趣
文天祥入衛戊子調民兵出守餘杭錢塘己丑獨松關
破馮驥死之張濡遁通判平江府鄭疇遁庚寅通判王
矩之都統制王邦傑遣人迎降于常州辛卯元兵趣撫
州都統密祐逆戰于璧邪兵敗死之癸巳以張世傑為
浙西制置副使兼知平江府甲午權禮部尚書王應麟
遁乙未左丞相留夢炎遁丙申遣使召夢炎還朝賜餘
杭武康長興縣民錢并免今年田租通判撫州施至道

以城降元十二月丁酉詔許賈似道歸葬庚子以吳堅
簽書樞密院事黃鏞兼權參知政事遣柳岳奉書詣元
軍乞班師修好癸卯以陳文龍為參知政事兼權知樞
密院事謝堂同知樞密院事甲辰嘉興府告急給封樁
庫錢為兵備命趙與偃戍縉雲縣復季可官令如龍泉
縣募兵乙巳以陳景行為浙東安撫副使戍處州起方
逢辰戍淳安縣丙午追封呂文德為和義郡王丁未出
安邊封樁庫金付浙東諸郡為兵備元兵入平江府起

吳君權為太府少卿提點臨平民兵遣使召留夢炎王
應麟皆不至戊申張世傑入衛加檢校少保王爚薨乙
酉括臨安府州縣馬庚戌柳岳還癸丑遣宗正少卿陸
秀夫刑部尚書夏士林兵部侍郎呂師孟使軍前且敕
呂文煥令通好罷兵己未方興丁廣趙文禮兵皆敗歸
庚申以柳岳為工部侍郎洪儒震為右正言使如元祈
請以文天祥簽書樞密院事黃萬石叛降于元元兵破
大洪山知隨州朱端履降于元權吏部尚書丁應奎左

侍郎徐宗仁遁癸亥遣使召留夢炎不至

二年春正月丁丑元兵陷潭州湖南安撫兼知州李芾
死之郡人知衡州尹穀亦舉家自焚帥司參議楊霆及
募屬陳億孫顏應焱等皆從芾死守將吳繼明劉孝忠
以城降于元元復陷寶慶通判曾如驥死之戊辰陸秀
夫等自元軍還

謹按通鑑輯覽

御批是時敵兵深入臨安已在掌握之中宋君臣即欲屈節
圖存元人安肯捨垂成之功遽為返旆乃始則抗請班師
繼則求封小國惟冀苟延殘喘甘于含垢包羞而不顧徒
辱其名而終歸無益直當諡為至愚而已獨惜陸秀夫後

既有負海之節而此時嘿無一言且奉稱姪孫之約以往見巴延何哉

己巳嘉興守劉漢傑

以城降于元庚午同簽書樞密院事黃鏞參知政事陳文龍遁以謝堂為兩浙鎮撫大使文天祥知臨安府金永堅浙東撫諭使辛未以吳堅為左丞相兼樞密使常楙參知政事日午宣麻文班止六人諸闕兵盡潰遣監察御史劉岳奉表稱臣上元主尊號歲奉銀絹癸酉左司諫陳孟虎監察御史孔應得遁甲戌元兵至瑞州知州姚岩棄城走乙亥以賈餘慶知臨安府丙子命吉王

是信王昺出鎮丁丑以夏士林簽書樞密院事己卯參
知政事常楙遁三學生誓死不去特與放釋褐出身以
楊亮節為福州觀察使提舉吉王府行事俞如珪為環
衛官提舉信王府行事元兵入安吉州知州趙良淳自
經死庚辰簽書樞密院夏士林遁癸未進封吉王昺為
益王判福州福建安撫大使信王昺為廣王判泉州以
留夢炎為江東西湖南北宣撫大使甲申元兵至皋亭
山遣監察御史楊應奎上傳國璽進降表是夜丞相陳

宜中遁張世傑蘇劉義劉師勇各以所部兵去乙酉元
兵次臨安以文天祥為右丞相兼樞密使都督丙戌命
同吳堅使如元軍以家鉉翁簽書樞密院事賈餘慶同
簽書樞密院事知臨安府戊子知建德軍方回知婺州
劉怡知處州梁椅知台州楊必大皆叛降元是月知臨
江軍滕岩瞻遁二月辛丑詔諭郡縣使降壬寅遣賈餘
慶吳堅謝堂劉岳家鉉翁充祈請使三月丁丑帝北行
五月丙申至元都元主以帝為開府儀同三司封瀛國

公是月陳宜中等立益王昞於福州遙上帝尊號曰孝
恭皇帝

益王昞廣王昺皆度宗庶子昞初封吉王昺信王德祐
二年正月文天祥尹臨安請以二王鎮閩廣不從洎元
兵迫臨安乃徙封昞為益王判福州福建安撫大使昞
為廣王判泉州兼判南外宗正事以駙馬都尉楊鎮及
楊亮節俞如珪為提舉鎮等奉二王走婺州元帥巴延
入臨安遣范文虎趣婺召鎮令以王還鎮得命即行曰

我將就死于彼以緩追兵亮節等遂負王徒步匿山中
七日其將張全以兵數十人追及之遂同走温州陸秀
夫蘇劉義繼至遣人召陳宜中于清澳張世傑于定海
世傑以所部兵同至溫之江心寺奉昱為天下兵馬都
元師曷副之以秀王與畢為福建察訪使兼安撫知西
外宗正趙吉甫知南外宗正兼福建同提刑先入閩中
撫諭吏民太皇太后尋遣內侍召二王于溫宜中等沈
之江中遂入閩時汀建諸州方欲從黃萬石降聞二王

至即閉城却使者萬石將劉俊宋彰周文英等亦多來
歸夏五月乙未朔宜中等乃奉昱于福州即皇帝位改
元景炎尊楊淑妃為太后同聽政進封信王昺為衛王
宜中為左丞相兼都督李庭芝為右丞相陳文龍劉黻
為參知政事張世傑為樞密副使陸秀夫為簽書樞密
院事命吳浚趙潛傅卓李班翟國秀等分道出兵改福
州為安福府温州為瑞安府行郊祀禮大赦文天祥自
鎮江亡歸庚辰以為右丞相兼知樞密院事遣其將如

江淮招豪傑并如温州募兵廣東經畧使徐直諒遣梁
雄飛請降于元軍元假雄飛招討使使徇廣州既而直
諒聞是立命權通判李性道摧鋒軍將黃俊等拒雄飛
于石門俊與雄飛戰而敗奔廣州直諒棄城遁六月甲
子雄飛入廣州俊死之吳浚聚兵于廣昌取南豐宜黃
寧都三縣翟國秀取秀山傅卓至衢信諸縣民多應之
以文天祥為同都督秋七月丁酉開府南劍州進取江
西已而吳浚兵敗于南豐翟國秀引還傅卓兵敗降于

元八月漳州亂命陳文龍為閩廣宣撫使以討之甲戌
秀王與鞏圍婺州丙子聞元兵至遂解歸以王積翁為
福建提刑招捕使知南劍州備禦上三郡黃恮為同提
刑招捕使知漳州備禦下三郡張世傑遣兵助吳浚與
元兵戰于兜零敗績奔寧都興化石手軍亂九月復以
陳文龍知興化軍東莞人熊飛守潮惠二州聞趙潛至
即以兵攻梁雄飛于廣州壬寅雄飛遁熊飛遂復韶州
壬子趙潛入廣州是月元將呂師夔張榮實將兵趣梅

嶺冬十月壬戌文元祥入江州趙潛遣曾逢龍就熊飛
禦元兵于南雄逢龍戰死熊飛奔韶州元軍圍韶州守
將劉自立以城降飛巷戰兵敗赴水死十一月元兵至
處州李珣以城降甲辰秀王與罕與元兵戰于瑞安觀
察使李世達死之與罕及其弟與慮子孟備監軍趙由
瑄察訪使林溫被執皆死元兵至建寧府守臣趙崇鏐
被執知邵武軍趙時賞知南劍州王積翁皆棄城去乙
巳益王入海癸丑元兵至福安州知州王剛中以城降益

王敬入泉州招蒲壽庚而壽庚有異志初壽庚提舉泉州舶司擅蕃舶利者三十年至是王舟至泉壽庚來謁請駐蹕張世傑不可或勸世傑留壽庚則凡海舶可下令自隨也世傑不從縱之歸繼而舟不足乃掠其舟并沒其貲壽庚怒乃殺諸宗室徙官及淮兵之在泉者而降于元璽遂移潮州是月福興化皆降元英德守臣凌彌堅等亦降十二月辛酉趙潛棄廣州遁乙丑吳浚走瑞金乙酉興化軍通判曹澄孫以城降知軍事陳文龍

被執不屈死之益王舟次於惠州之甲子門至元十四

年謹按通鑑輯覽

御批宋自建炎南渡已屬偏安然德祐以前尚有疆域可憑朝廷規模未失猶可比之東晉至臨安既破帝羸見俘宗社成墟宋統遂絕則自丙子三月以後正統即當歸之于元若昱曷二王崎嶇海島雖諸臣殉國苦心而殘喘苟延流離失據不復成其為君且奉表乞降于元正與明唐桂二王之竄迹闖滇者無異朕近于國史傳凡斥唐桂二王諸臣為偽者概令更正為明蓋以其猶存一綫雖不足稱正統然謂之為偽實不可此萬世之公論也今續綱目于景炎祥興仍用大書紀年則又阿徇不倫乖史筆之正即如元自順帝北遷沙漠未嘗不子孫繼立苗裔屢傳然既委棄中原編年者即不大書故號此正也則知昱曷之已失中原而仍大書故號之非正矣夫廢興嬗代其書法自

有一定不可稍存偏袒之私因
為改正書法而闡其大旨如此
正月元兵破汀關癸巳知

循州劉興降于元壬寅文天祥走漳州吳浚以汀州降
元潮州梅州皆降二月元兵下廣州廣東諸郡皆降三
月文天祥復梅州陳文龍從子瓚復興化軍夏四月文
天祥復興化縣廣東制置使張鎮孫襲廣州取之五月
張世傑復潮州文天祥入會昌縣淮民張德興亦起兵
殺太湖縣丞王德顯據司空山攻下黃州壽昌軍六月
辛酉文天祥取雩都已卯入興國縣秋七月取吉贛諸

縣圍贛州衡山人趙璠撫州人何時起兵應之乙巳張
世傑圍泉州遣將高日新復邵武軍元將攻文天祥于
興國八月天祥與戰敗績乃引兵即鄒鳳於永豐瀨兵
亦潰壬申文天祥又敗于興國己卯元兵破司空山張
德興敗走甲申天祥至空坑兵潰遂挺身走循州九月
元兵援泉州戊申益王舟次廣州淺灣元兵入大庾嶺
又取邵武入福州冬十月甲辰破興化軍陳瓚死之進
攻潮州又攻惠州十一月元將達春圍廣州庚寅張鎮

孫以城降元將劉深以舟師攻淺灣益王舟走秀山陳
宜中入占城遂不反十二月丙子舟至井澳颶風大作
舟敗幾溺益王驚悸成疾旬餘兵士稍集死者過半丁
丑劉深襲井澳益王走七州洋欲往占城不果三年春
正月張世傑攻雷州不克己酉元兵克涪州二月破潮
州知州馬發死之三月文天祥取惠州廣州都統凌震
轉運判官王道夫復廣州益王駐碭洲曾淵子至自雷
州以為參知政事廣西宣諭使夏四月戊辰益王殂于碭

洲年十一稱端宗皇帝庚午衆立衛王昺為帝以陸秀夫為左丞相五月癸未朔改元祥興乙酉升碭洲為翔龍縣遣張應科王用取雷州應科三戰不利用降于元六月丁巳應科再戰死之知高州李象祖降于元己未衛王徙居新會崖山升廣州為翔龍府己卯元將張弘範李恒趣崖山冬十一月癸巳瓊州民執安撫趙興珞降于元閏月庚戌王道夫棄廣州遁壬戌凌震遁癸亥元兵入廣州十二月壬午王道夫攻廣州兵敗被執凌

震兵繼至亦敗文天祥走海豐壬寅被執於五坡嶺元兵破南安縣守將李梓發死之至元十六年正月壬戌元將張弘範兵至厓山庚午李恒兵亦來會張世傑以舟師碇海中四周起樓如城堞居王於中元兵攻之艦堅不動二月戊寅世傑部將陳寶降己卯都統張達夜襲元軍營亡失甚衆癸未元兵急攻之世傑殊死戰已而軍潰翟國秀及團練使劉俊等解甲降世傑乃與蘇劉義斷維奪港而去陸秀夫負衛王投海中溺死年九

歲後宮及諸臣多從死者楊太后亦赴水死世傑葬之海濱已而世傑亦自溺死宋遂亡

帝熈德祐二年益王昞廣王昺共三年

右宋十六帝合三百二十年



欽定續通志卷四十

欽定四庫全書

史部

欽定續通志卷四十二

主事臣尹壯圖覆勅

總校官原任侍講臣王燕緒

欽定四庫全書

欽定續通志卷四十一

遼紀

太祖

太宗

太祖皇帝姓耶律氏諱億字安巴堅小字多爾濟契丹
德呼勒部實喇伊色哩鄉耶律密拉人也其先出自炎
帝世為審吉國其後有奇善者徙潢河之濱傳至雅里
始立制度置官屬刻木為契穴地為牢讓蘇爾威而不肯

自立雅里生必塔必塔生海蘭海蘭生弩爾蘇是為肅
祖肅祖生薩喇達嘗與黃室韋挑戰矢貫數札是為懿
祖懿祖生伊德實始教民稼穡善畜牧國以殷富是為
玄祖玄祖生薩勒題始置鐵冶教民鼓鑄是為德祖世
為契丹約尼氏之額爾竒木執其政柄太祖德祖長
子也生三月能行既長身長九尺闊弓三百斤為塔瑪
霞實呀時小黃室韋不附太祖以計降之伐揚阿及烏
爾古六奚必實霞諸部克之國人號額珍寶呀唐天復

元年歲辛酉哈陶津汗以太祖為本部額爾奇木專
征討連破室韋于厥及奚帥錫爾格授大德呼勒府額
爾奇木明年七月以兵伐河東河北攻下九郡明年九
月復攻下河東懷遠等軍畧薊北而還先是德祖俘奚
七千戶徙饒樂之清河至是創為奚德呼勒部分十三
縣拜太祖裕悅總知軍國事明年九月討黑車子室韋
唐盧龍軍節度使劉仁恭發兵拒之太祖伏勁兵殲其
衆乘勝大破室韋明年七月復討黑車子室韋唐河東

節度使李克用遣使請和十月太祖以騎兵七萬會克

用於雲州

通鑑在梁開平元年是為太祖即位之元年此據五代史記第五代史及契丹國志並

云以兵三十萬本史兵衛志亦同而此則云七萬為互異也約為兄弟遂進兵擊劉仁

恭拔數州徙其民以歸明年二月復擊劉仁恭還襲山

北奚破之唐宣武軍節度使朱全忠遣使來聘十一月

遣師討奚霄諸部之未附者悉破降之十二月哈陶津

汗殂羣臣奉遺命請立太祖太祖三讓從之

元年春正月庚寅即皇帝位尊母蕭氏為皇太后立皇

后蕭氏羣臣上尊號曰天皇帝后曰地皇后庚子詔皇族承約尼氏九帳為第十帳二月戊午以從弟達勒達為德呼勒府額爾奇木是月征黑車子室韋降其八部夏四月唐梁王朱全忠廢其主尋弒之自立為帝國號梁遣使來告五月丁丑布呼默呼使於梁梁遣使者來秋七月乙酉唐平州刺史劉守奇率其衆來降置之平盧城冬十月乙巳討黑車子室韋破之

二年春正月癸酉朔御正殿受百官及諸國使者朝辛

已始置特哩袞典族屬以弟薩喇為之唐晉王李克用
卒子存勗襲遣使弔慰二月遣使如梁夏五月癸酉薩
喇討烏丸黑車子室韋遣使如梁冬十月己亥築長城
於鎮東海口遣輕兵取托歡判入室韋者

三年春正月如遼東二月丁酉朔梁遣使者來三月滄
州劉守文為弟守光所攻遣人來乞兵命弟錫里素額
爾奇木蕭達魯以兵會守文於北淖口進擊守光破之
守光潰去夏五月甲申置羊城於炭山之北以通市易

破之
秋八月遣使如梁冬十月己巳遣鷹軍討黑車子室韋

四年秋七月戊子朔以后兄蕭達魯為北府宰相后族
為相自此始冬十月烏滿山奚庫濟及扎魯特超默特
等叛討平之

五年春正月
遼史於此紀日食茲已具五代紀故不錄
以後均列入五代及宋紀其遼史不復著

丙申帝親征西部奚遂分兵討東部奚悉平之於是盡
有奚膏之地三月次灤河刻石紀功復畧地薊州夏四

金史紀事本末卷之二十一
卷四十一
月壬申遣人使梁五月弟埒克特爾格伊德實安圖謀
反安圖妻訥默庫以告帝與諸弟刑牲告天地為誓而
赦其罪出埒克為德呼勒部額爾奇木封訥默庫為晉
國夫人秋八月甲子幽州劉守光僭號稱燕冬十一月
壬午遣人使梁

六年春二月戊午親征劉守光三月至自幽州夏四月
梁郢王友珪弑其父自立秋七月丙午親征珠巴克降
之命弟埒克分兵攻平州埒克破平州還冬十月戊寅

復與特爾格伊德賓安圖等反甲申遣使如梁壬辰帝次北阿嚕山埒克等以兵阻道帝南趨十七澗是日燔柴翼日次七渡河埒克等遣人謝罪

七年春正月晉王李存勗拔幽州擒劉守光以歸甲寅次赤水城埒克等乞降帝素服慰遣之二月梁均王友貞討友珪殺之乃嗣位三月癸丑次蘆水達刺與安圖擁千餘騎至遂拘之以所部分隸諸軍而埒克引其衆至伊蘇濟勒淀具天子旗鼓將自立聞車駕且至掠居民北

走帝以兵追之伊德實徑趨行宮焚輜重廬帳其黨珊
蘇庫復劫西樓帝至土河盡以先所獲資畜分賜將士
留伊勒希巴珠勒呼總政務夏四月戊寅北追埒克已
卯至達掄淀選輕騎追及之於布扎爾河盡獲其輜重
生口先遣室韋及托歡酋長巴爾德里古等五人分兵
伏其前路命北宰相德里古為先鋒進擊之埒克逆戰
衆潰而走追至柴河伏發合擊遂大敗之帝次扎都河
五月甲寅北宰相達年擒埒克尼嚕古阿巴於榆河壬

戊送詣行在丙寅至庫哩以青牛白馬祭天地六月辛
已至榆嶺以實喇縣人繯古非法殘民磔之甲申登都
庵山獄官聶呼擅造大校誅之壬辰次狼河擊裕庫呼
盡獲其衆庚子次阿敦樂以養子納喇蘇附諸弟以叛
殺之其餘黨各以輕重論刑命額爾奇木尼魯古自投
崖死秋七月次烏林河觀魚

據遊幸表增輯自後凡
據表增入者概不復注八

月己卯幸龍眉宮九月壬戌帝發自西樓冬十月庚午
駐赤崖十一月祠木葉山還次扎古山省風俗見高年

議朝政定吉凶儀十二月戊子燔柴於蓮花樂

八年春正月甲辰以赫魯為德呼勒部額爾奇木呼哩
為特哩袞裕庫呼部人執逆黨來獻杖殺其首惡布呼
餘並原釋之有司所鞠逆黨三百餘人獄既具帝賜之
宴一日明日乃以輕重論刑首惡埒克次達喇帝不忍
寘以法杖而釋之以伊德實安圖為埒克所使皆釋之以
前裕悅哈達拉子嘉哩埒克妻實喇勒濟實預逆謀皆絞
殺之伊德實妻聶呼魯從安圖妻訥默庫嘗有忠告竝免死

秋七月丙申有司上諸帳族與謀逆者三百餘人皆棄市

九年春正月烏爾古部叛討平之夏六月幽州軍校齊行本舉其族及部曲來降詔授檢校尚書左僕射賜名烏雲數日復叛去盧龍節度使周德威納之乃議南征是月射野馬於漢北冬十月戊申釣魚於鴨綠江吳越王遣使來貢

神冊元年春二月丙申羣臣及諸屬國上尊號曰大聖

大明天皇帝后曰應天大明地皇后大赦建元神冊國號曰契丹三月丙辰以德呼勒部額爾奇木赫魯為阿勒達爾裕悅百僚進秩頒賚有差賜酺三日立子倍為

皇太子夏四月乙酉朔晉幽州節度使盧國用來降以

為幽州兵馬留後

按此時晉幽州節度使為周德威觀此紀上年及下年俱有幽州周德威

可見况此盧國用者新舊五代史及通鑑皆無其人疑此及天顯元年所書皆用盧文進致誤也

甲辰

梁遣使者來六月庚寅吳越王遣使來貢秋七月壬申親征突厥托歡党項小蕃沙陀諸部皆平之八月拔朔

州擒其節度使李嗣本勒石紀功於奇塚南冬十一月
攻蔚新武媯儒五州自代北至河曲踰陰山盡有其地
遂改武州為歸化州媯州為汗州置西南面招討司十
二月收山北八軍

二年春二月晉新州裨將盧文進殺其節度使李存矩
來降遂攻新州下之三月辛亥進攻幽州周德威以兵
逆戰於居庸關之西大破之以后第阿古齊為統軍舒魯
為先鋒東出關畧燕趙不見敵而還己未裕庫呼叛命

舒魯討之夏四月壬午圍幽州不克辛卯梁遣使者來
六月乙巳以暑潦班師留赫魯盧國用守之埒克與其
子賽音伯哩叛入幽州秋八月李存勗遣李嗣源等救
幽州赫魯等以兵少而還

三年春正月丙申以弟安圖為大內特哩袞命攻雲州
及西南諸部二月癸亥城皇都梁遣使來聘晉吳越渤
海高麗回鶻準布克項及幽鎮定魏潞等州各遣使者
來夏四月乙巳達喇復謀叛誅其妻尼魯古而赦達喇

遼史以尼嚕表為伊德實
之妻茲據宏簡錄改解

五月乙亥詔建孔子廟秋七

月乙酉裕悅赫魯薨冬十二月庚子翔如遼陽故城卒
丑北府宰相蕭達魯薨戊午以裕悅赫魯弟裕勒沁為
德呼勒部額爾奇木蕭阿古齊為北府宰相

四年春正月丙申射虎於東山二月丙寅修遼陽故城
以漢民渤海戶實之改為東平郡夏五月庚辰至自東
平郡秋八月丁酉謁孔子廟九月征烏爾古部道聞皇
太后不豫一日馳六百里還侍太后病間復還軍中冬

十月丙午次烏爾古部命皇太子將先鋒軍進擊破之
自是舉部來附

五年春正月乙丑始製契丹大字夏五月丙寅吳越王
遣使來貢庚辰有龍見於伊喇山陽水上帝射獲之藏
其骨於內府閏六月丁卯以弟蘇為特哩袞康默記為伊勒
希巴秋八月己未朔党項諸部叛辛未親征九月己丑朔梁
遣使者來壬寅大字成詔頒行之皇太子率德呼勒部
額爾奇木裕勒沁等畧地雲內天德冬十月辛未攻天

德癸酉天德軍節度使宋瑤出降更其軍曰應天甲戌
班師宋瑤復叛丙子旋師攻之擒宋瑤徙其民於陰山
南十二月己未師還

六年春正月丙午以弟蘇為南府宰相迪里為特哩袞宗
室為南府宰相自此始夏五月丙戌朔詔定法律正班
爵丙申詔畫前代直臣像為詔諫圖及詔長吏以四孟
月詢民利病冬十月癸丑朔晉新州防禦使王郁以所
部山北兵馬來附丙子帝率大軍入居庸關十一月癸

卯下古北口丁未分兵畧檀順安遠三河良鄉望都潞
滿城遂城等城俘其民徙內地十二月庚申皇太子率
王郁畧地定州康默記攻長蘆癸亥圍涿州破其郭癸酉刺史
李嗣弼以城降乙亥李存勗引兵趨望都托輝以五千騎圍
之李嗣昭來救大軍不利引歸存勗至幽州遣騎來躡
大軍反擊悉擒之己卯還次檀州幽人來襲擊走之徙
檀順民於東平瀋州

天贊元年春二月庚申復徇幽薊地癸酉改元赦軍前

殊死以下夏四月甲寅攻薊州戊午拔之擒其刺史胡
瓊以盧國用尼魯古典軍民事壬戌大饗軍士癸亥李
存勗圍鎮州張文禮使來求援命卽君迪里將軍康未
恒赴之擊敗河東兵殺其將李嗣昭辛未攻石城拔之
六月遣鷹軍擊西南諸部冬十月甲子以蕭希達為北
府宰相分德呼勒部為二院寔訥齊為北院額爾奇木
烏蘇為南院額爾奇木詔分北達寧額為二部立兩節
度使以統之十一月壬寅命子擢庫濟為天下兵馬大

元帥畧地薊北

二年春正月甲申擢庫濟克平州獲其刺史趙思溫裨
將張崇二月如平州甲子以平州為盧龍軍三月戊寅
軍於箭筈山討叛奚呼遜獲之置奚托輝部以布倫權
總其事夏四月己酉梁遣使來癸丑擢庫濟攻幽州德
呼勒部額爾奇木迪里徇山西地庚申擢庫濟軍幽州
東節度使符存審出戰敗之閏月庚辰擢庫濟抵鎮州
壬午拔曲陽丙戌下北平是月晉王李存勗即皇帝位

國號唐五月戊午耀庫濟師還癸亥大饗軍士賞賚有
差秋七月前北府宰相蕭阿古齊及王郁徇地燕趙冬
十月唐滅梁

三年春正月遣兵畧地燕南夏五月丙午以特里衮迪
里為南院額爾奇木是月徙薊州民實遼州地渤海殺
其刺史張秀實而掠其民六月乙酉大舉征托歡党項
準布等部詔皇太子監國大元帥耀庫濟從行秋七月
辛亥哈喇等擊索歡納山東部族破之八月乙酉至烏

爾古山甲午次古單于國登阿勒坦音德爾山九月丙
申朔次古回鶻城勒石紀功獵於烏都溫山觀魚烏爾
古河庚子拜日於蹕林丙午遣騎攻準布南府宰相蘇
南院額爾奇木迪里畧地西南乙卯蘇等獻俘丁巳鑿金河
水取烏山石輦致潢河木葉山甲子詔礮丕勒阿汗故
碑以契丹突厥漢字紀其功是月破呼穆蘇山諸蕃部
次伊德實山以赤牛青馬祭天地冬十月丙寅獵於約
羅山丁卯軍於巴爾斯山遣兵踰流沙拔浮圖城盡取

西鄙諸部十一月乙未朔獲甘州回鶻都督必里克遣使諭其主烏穆珠汗射虎於烏蘭賓呀山十二月攻蔚州四年春二月丙寅耀庫濟畧党項丁卯皇后遣康穆騰問起居進御服酒膳乙亥蕭阿古齊畧燕趙還進牙旗兵仗辛卯耀庫濟獻党項俘三月丙申饗軍於水精山夏四月甲子南攻小蕃下之五月甲寅清暑於室韋北陞秋九月癸巳至自西征冬十月丁卯唐以滅梁來告即遣使報聘十一月丁酉如安國寺飯僧赦京師囚縱

五坊鷹鷂十二月乙亥詔親征渤海大諲譔皇后皇太子大元帥擢庫濟皆從閏月壬辰祠木葉山壬寅以青牛白馬祭天地於烏山己酉次色克山丁巳次高嶺夜圍扶餘府

天顯元年春正月庚申拔扶餘城誅其守將丙寅命特里袞安圖前北府宰相蕭阿古齊等將萬騎為先鋒遇諲譔老相兵破之是夜圍忽汗城辛未諲譔出降帝優禮而釋之丁丑諲譔復叛攻其城破之諲譔請罪馬前

詔以兵衛之出城祭告天地二月庚寅安邊鄭頡南海
定理等府及諸道節度刺史來朝俱慰遣之壬辰以青
牛白馬祭天地大赦改元以平渤海遣使報唐甲午如
忽汗城閱府庫物賜從臣有差以奚部長布倫王郁回
鶻新羅吐蕃党項室韋沙陀烏爾古等從征有功優加
賞賚丙午改渤海國為東丹忽汗城為天福冊皇太子
倍為人皇王以主之赦其國內殊死以下三月戊午遣
額爾奇木康默記左僕射韓延徽攻長嶺府甲子祭天

丁卯辛人皇王宮已巳安邊鄭頡定理三府叛遣安圖
討平之癸未宴東丹國僚佐頒賜有差乙酉班師以大
譴譟舉族行夏四月丁亥朔次織子山是月唐成德軍
節度使李嗣源反伶人郭存謙弒其主存勗嗣源遂襲
位五月辛酉南海定理二府復叛擢庫濟討平之六月
丙午次慎州唐遣使以國哀告秋七月丙辰鐵州刺史
衛鈞反乙丑擢庫濟討平之盧龍行軍司馬張崇叛奔
唐甲戌次扶餘府帝不豫辛巳帝崩年五十五諡曰大

聖大明神烈天皇帝廟號太祖陵曰祖陵

太祖始建元九年神冊六年天贊四年天顯一年

凡二十年

太宗皇帝諱德光字德謹小字耀庫濟太祖第二子也
母曰淳欽皇后蕭氏天贊元年授天下兵馬大元帥尋
詔統六軍南徇地下平州破箭筈山呼遜奚諸部及從
太祖破伊奇哩諸部定河壩党項下山西諸鎮取回鶻
單于城東平渤海破達羅克部所向皆有功天顯元年

七月太祖崩皇后攝軍國事八月甲午奉梓宮西遷壬寅太宗自元帥行營奔赴行在乙巳人皇王倍繼至九月壬戌南府宰相薨丁卯梓宮至皇都冬十月盧龍軍節度使盧國用叛奔唐十一月丙寅殺南院額爾奇木耶律迪里郎君耶律畢老等

二年秋八月丁酉葬太祖皇帝於祖陵置祖州天城軍節度使以奉陵寢冬十一月壬戌太宗即皇帝位初淳欽皇后愛太宗欲立之而以人皇王長恐國人不從故

太祖崩已逾年后稱制攝事至是召人皇王與帝俱乘馬立帳前謂諸酋長曰二子皆愛之莫知所立汝曹擇可立者執其轡諸人揣知后意爭執帝轡謹躍曰願事元帥后乃曰此衆意所欲吾安敢違之帝遂立為天皇

王而人皇王復歸東丹

據契丹國志及通鑑改輯

戊辰帝還都羣

臣上尊號曰嗣聖皇帝大赦有司請改元不許十二月庚辰尊皇太后為太皇太后皇后為應天皇后立妃蕭氏為皇后己丑祀天地庚寅遣使諭諸國辛卯

閱羣牧於近郊

三年春正月庚午以王郁為興國軍節度使守中書令
二月如長樂三月乙卯東蒐癸亥獵於殺鞬山乙丑獵
松山唐義武軍節度使王都遣人以定州來歸且使乞
援命奚托里塔拉以兵赴之四月戊寅東巡丙申獵于三山
塔拉敗唐將王晏球於定州唐兵大集塔拉請益師辛
丑命特哩衮尼魯衮都統察喇赴之五月丙午獵於索
囉山丁卯命林牙圖魯卜討烏爾古部己巳女真來貢

六月己卯行色克色哩禮秋七月壬子王都奏塔拉兵
敗死之尼魯古察喇等數十人被執庚午有事於太祖
廟八月庚辰建應天皇太后誕聖碑於儀坤州九月己
卯圖魯卜遣人獻烏爾古俘己丑幸人皇王倍第庚寅
遣使如唐辛卯再幸人皇王第冬十一月辛丑帝自將
伐唐十二月癸卯祭天地甲寅次杏塢唐遣使至遂班
師詔耶律伊濟遷東丹民以實東平升東平郡為南京
四年春正月己卯如瓜塢獵於潢河三月甲午望祀羣

神夏四月甲寅如天城軍謁祖陵辛酉人皇王來朝癸亥錄囚五月戊子射柳於太祖行宮癸巳行色克色哩禮六月丙午圖魯卜獻烏爾古得巳酉西巡巳未獵近山癸亥駐蹕涼陁秋七月庚辰曲赦繫囚甲午祠太祖而東八月癸卯幸人皇王第九月庚午如南京戊寅祠木葉山巳卯行再生禮癸巳至南京冬十月壬寅幸人皇王第甲辰閱軍籍庚戌大閱六軍甲子以弟魯呼帥師趨雲中討郡縣之未附者十一月丙寅朔以出師告

天地壬申告出師於太祖行宮甲申觀漁於三义口十
二月戊午至自南京

五年春正月庚午魯呼拔寰州二月癸卯李胡還自雲
中丙午以先所俘渤海戶賜之辛酉召羣臣議軍國事
三月魯呼請赦宗室錫里郎君以罪繫獄者從之乙亥
冊弟魯呼為壽昌皇太子兼天下兵馬大元帥壬午以
龍化州節度使劉居言同中書門下平章事庚寅駕發
南京夏四月乙未詔人皇王先赴祖陵丙辰會謁祖陵

人皇王歸國五月己亥射柳於行在乙卯如汧柳湖丁
巳拜太祖御容於明殿秋八月丙午如九層臺九月庚
辰詔置人皇王儀衛丁亥至自九層臺冬十月癸卯建
太祖聖功碑於舒伊旺尼珠瑯溫十一月戊寅東丹奏
人皇王浮海奔於唐

六年春正月甲子西南邊將以慕化哈嚙斯國人來丁
卯如南京三月丁亥人皇王妃蕭氏率其國僚屬來見
夏四月己酉唐遣使者來是月置中臺省於南京五月

乙丑祠木葉山乙亥至自南京閏月庚寅射柳於近郊
六月壬申如涼陞秋七月己酉命將士南畧壬子薦時
果於太祖廟東巡九月甲午修京城冬十一月乙酉唐
遣使者來十二月丙辰遣人以詔賜唐盧龍軍節度使
趙德鈞

七年春正月己亥唐遣使者來癸卯遣使如唐戊申祠
木葉山二月壬申伊喇迪里使吳越還吳越王錢鏐遣
使從獻寶器復遣使報之三月丁未遣使諸國夏四月

甲戌唐遣使者來致人皇王倍書六月戊辰御製太祖
建國碑秋七月辛巳朔賜中外官吏物有差癸未賜高
年布帛丙戌召羣臣耆老議政壬辰唐遣使者來癸巳
使復至壬寅唐盧龍軍節度使趙德鈞遣人進時果丁
未薦新於太祖廟八月壬戌捕鵝於泚柳湖冬十月乙
卯唐遣使者來己巳遣使如雲中十一月丁亥遣使存
問呼哩國己丑唐蔚州刺史張彥超以城來降以為大
同軍節度使十二月丁巳西狩駐蹕平地松林

八年春正月庚子命魯呼及左威衛上將軍色克率兵
伐党項三月辛卯魯呼討党項還宴勞之丙申唐遣使
請罷征党項兵帝使以戰捷報之夏四月戊午党項來
貢五月己丑獵於獨牛山戊戌如泂柳湖秋七月戊寅
行納后禮冬十月丙午至自泂柳湖辛亥唐遣使者來
已未遣使如唐十一月辛丑太皇太后崩遣使告哀於
唐及人皇王倍是月唐主嗣源殂子從厚立

九年春正月癸酉漁於土河閏月戊午唐使來告哀遣

使弔祭壬戌東幸二月壬申祠木葉山夏四月唐潞王
李從珂弒其主自立人皇王倍自唐上書請討之五月
甲辰如汾柳湖辛未唐李從厚所遣謝弔祭使至闕秋
八月壬午自將南伐九月乙卯次雲州丁巳拔河陰冬
十月丁亥畧地靈丘十一月辛丑圍武州之陽城壬寅
降之癸卯斡齊爾城降籍所俘丁壯為兵十二月駐蹕
百湖之西南

十年春正月戊申皇后崩於行在二月辛巳宰相尼嚕

古謀南奔事覺執之夏四月吐谷渾酋長推勒伊德率
衆內附丙戌皇太后父族及母前夫之族二帳竝為國
舅以蕭默色為尚父領之己丑錄囚五月丙申攻新州及
振武癸丑以錫里王庭鷲為龍化州節度使六月辛未
如頻布里淀秋七月乙卯獵於南赤山冬十二月庚辰
如金瓶灤遣伊喇華格科爾羅和囉木薩噶等捉生敵
境

十一年春正月釣魚於土河庚申如潢河夏五月戊戌清

暑泂柳湖秋七月丙申唐河東節度使石敬瑭為其主
所討遣使來告急遂許興師八月己未遣使如河東報
師期庚午帝自將南行九月丁酉入鴈門戊戌次忻州
祀天地己亥次太原庚子及唐將張敬達戰於太原大
敗之敬達走保晉安寨額爾奇木達魯與戰死之敬瑭
率其屬來見帝執手撫慰之癸卯圍晉安甲辰以達魯
子圖勒理嗣為額爾奇木冬十月甲子封敬瑭為晉王幸
其府敬瑭與其妻李氏親捧觴上壽十一月丁酉冊敬

瑋為大晉皇帝閏月甲子唐將楊光遠安審琦殺其帥
敬達以降帝聞敬達至死不變謂左右曰凡為人臣當
如此也命以禮葬之丙寅祀天地以告成功初圍晉安
分遣精騎守要害以絕援兵唐主所遣趙延壽范延廣
趙德鈞等皆逗遛不敢進至是聞敬達死各遁歸帝命
皇太子以輕騎馳擊之降其衆辛未帝次圍栢谷趙德
鈞父子以其衆來降次潞州議班師與晉帝約為父子
命德勒賓將五千騎送之南行臨別謂之曰朕當留此

候汝入洛乃還也辛巳敬瑭至河陽唐主李從珂遣人
殺人皇王倍乃舉族自焚詔收唐士卒戰死者瘞之汾
水上以為京觀晉帝命桑維翰為文紀帝功德十二月
乙酉遣近侍塔魯存問晉帝戊子遣使馳奏皇太后及
報諸道師還庚寅發太原辛卯聞晉帝入洛遣郎君濟
勒岱撫問壬辰次細河閱降將趙德鈞父子兵馬庚戌
如應州癸丑唐大同彰國振武三節度使迎見留之不
遣

十二年春正月丙辰次堆子口唐大同軍節度判官吳

巒閉城拒守遣崔廷勳圖之晉帝召巒還遣使請解圍

許之

遼史作帝親至城下諭降巒誤也觀下會同七年吳巒守貝川事可見今據五代史改輯

壬戌

祀天地丙寅皇太后遣侍衛實魯趣行是夕率輕騎先

進丁丑告功太祖行宮戊寅朝於皇太后二月癸卯晉

遣唐所掠郎君埒克文班吏蕭岱爾還朝三月庚申晉

遣使來貢丁卯晉天雄軍節度使范延廣請內附不納

己巳遣郎君達里庫穆爾德呼使晉壬午晉使來見夏

四月如平地松林觀潢水源五月甲寅如頻布里淀六月甲申晉遣戶部尚書聶延祚等請上尊號及歸鴈門以北與幽薊之地仍歲貢帛三十萬疋秋七月辛亥詔諸部治兵甲癸丑如懷州謁奉陵甲子晉遣使來告范延廣反庚午遣耶律尼固呼使晉議軍事八月癸未晉遣使復請上尊號不許庚寅晉及太原劉知遠南唐李昇各遣使來貢庚子晉遣使以都汴及范延廣降來告九月庚申遣珠勒呼使晉及南唐辛未遣使如高麗鐵

驪冬十月庚辰晉使來賀皇太后永寧節十一月己未遣使求醫於晉十二月甲申東幸祠木葉山

會同元年春正月戊申朔晉遣使來賀戊辰遣使如晉二月丁酉獵於松山戊戌如遼河東三月癸酉東幸夏四月戊寅朔如南京乙酉如溫泉己丑還宮己亥西南邊大詳袞耶律羅卜科奏党項捷五月甲寅晉復遣使請上尊號許之六月辛卯南唐來貢癸巳詔建日月四時堂圖寫古帝王事於兩廡秋七月癸亥遣使賜晉馬

丁卯遣呼喇岱使於晉摩哩拉呼使南唐戊辰遣中臺
省右相耶律蘇蘭特爾格使晉臨海軍節度使趙思溫
副之冊晉帝為英武明義皇帝九月晉遣守司空馮道
左散騎常侍韋勳來上皇太后尊號左僕射劉煦右諫
議大夫盧重上皇帝尊號冬十月壬寅晉遣使來謝冊
禮是日復有使進獨峯駝及名馬十一月壬子皇太后
御開皇殿馮道韋勳冊上尊號曰廣德至仁昭烈崇簡
應天皇太后甲子行再生柴冊禮丙寅皇帝御宣政殿

劉煦盧重冊上尊號曰睿文神武法天啓運明德章信

至道廣敬昭孝嗣聖皇帝大赦改元建國號曰大遼遼史

此語係之大同元年其實大同元年以晉百官言中外皆願戴皇帝故改晉號為遼而遼之建號則自在此時

也今並據五代史及契丹國志改輯是月晉復遣趙瑩奉表來賀以幽薊

瀛莫涿檀順媯儒新武雲應翔寰蔚十六州并圖籍來

獻於是詔以皇都為上京府曰臨潢升幽州為南京南

京為東京改新州為奉聖州武州為歸化州更定官制

十二月戊戌遣通果阿巴等使於晉制加晉馮道守太

傳劉煦守太保餘官各有差

二年春正月乙巳以受晉冊遣使報南唐高麗戊申晉遣金吾衛大將軍馬從斌考功郎中劉知新來貢珍幣丙辰晉遣使謝免沿邊四州錢幣二月獵於盤山癸巳謁太祖廟賜在京吏民物及內外羣臣官賞有差丁酉加兼侍中左金吾衛上將軍王郚檢校太尉三月畋於裏潭丁巳封子舒嚕為壽安王雅斯哈為太平王己巳大賚百姓夏四月乙亥如木葉山五月乙巳南唐遣使

來貢六月駐蹕頻布里淀秋七月戊申晉遣使進犀帶
是月獵於炭山閏月癸未乙室大王坐賦調不均撻而釋之
并罷南北府民上供及諸賦役非舊制者乙酉遣迪里
賜晉烏爾古良馬八月乙丑晉遣使貢歲幣九月己卯
遣使如晉冬十二月庚子釣魚於土河

三年春正月戊子吳越王遣使來貢壬辰遣陪謁阿鉢
使晉致生辰禮晉以并鎮忻代之吐谷渾來歸二月己
亥奚王魯古魯率六節度使朝貢庚子烏爾古遣使獻

伏鹿國俘三月戊辰遣使如晉己巳如南京丙子羅卜
科上党項俘獲數癸未獵於水門庚寅詔扈從擾民者
從軍律甲午如薊州乙未晉及南唐各遣使來覲夏四
月庚子至燕備法駕入自拱辰門御元和殿行入閣禮
壬寅遣使如晉乙巳幸留守趙延壽別墅丙午晉遣宣
徽使楊端王眺等來問起居丙辰晉遣使進茶藥癸亥
晉遣使賀端午五月庚辰晉遣使進弓矢甲申遣子天
德及檢校司徒卽用和使晉戊子閱騎兵於南郊六月

丙申閔步卒庚子晉遣使來見壬寅駕發燕京癸丑次奉聖州甲寅勞軍士秋七月己巳獵於哈達拉山己卯以鎮州安重榮叛晉詔征南將軍柳嚴邊備辛卯晉遣使請行南郊禮許之八月壬寅遣使如南唐南唐遣使求青氈帳賜之丙辰詔以伊奇哩河臚朐河之近地給賜南院鄂津圖魯伊遜巴勒北院烏納哈喇三錫林人為農田九月壬午邊將奏破吐谷渾丙戌晉遣使貢名馬戊子吳越王遣使來貢冬十月辛丑遣剋即使吳越魯庫

使南唐庚申晉遣使貢布及請親祠南嶽從之十一月
己巳南唐遣使奉蠟九書言晉密事丁丑詔有司教民
播種紡績十二月甲午燔柴丙申遣使如晉丙辰詔契
丹人投漢官者從漢儀聽與漢人婚姻是冬駐蹕於緄
淀

四年春正月壬戌以伊實彭布突厥三部歸寡不能自
存者官為之配丙子南唐遣使來貢庚辰納喇威二部
伊實彭布突厥三部並獻党項俘二月甲辰晉遣使進

香藥丁巳詔編始祖奇善汗事迹己未晉遣楊彥詢來
貢且言鎮州安重榮跋扈狀是月晉鎮州安重榮執遼
使者伊喇三月癸酉晉以祀南郊遣使來謝進黃金夏
四月己卯晉遣使進櫻桃五月庚辰吐谷渾額爾奇木
蘇等叛入晉遣德呼往諭晉及太原守臣六月辛卯振
武軍將趙崇逐其節度使耶律華喇以朔州叛附於晉
丙午命宣徽使尼古察討之秋七月癸亥南唐遣使奉
蠟丸書壬申晉遣使進水晶硯八月癸巳南唐奉蠟丸

書庚子晉遣使進犀弓竹矢吳越王遣使奉蠟丸書九月丁丑如歸化州冬十月癸卯吳越王遣使來貢十一月丙寅晉以討安重榮來告庚午吐谷渾請降遣使撫諭之十二月戊子晉遣使來告山南節度使安從進反庚寅南唐遣使奉蠟丸書戊戌晉遣王升鸞來貢戊申晉以敗安重榮來告遂遣楊彥詢歸辛亥晉遣使乞罷戍兵詔特哩袞碩格班師甲寅攻拔朔州

五年春正月戊午詔求直言命政事令僧隱等以契丹

戶分屯南邊戊辰晉函安重榮首來獻癸酉遣使如晉
是月晉以朔州平遣使來賀遂遣客省使耶律華格使
晉并致生辰禮二月壬辰以明王溫代裕悅新為西南
路招討使以討吐谷渾甲午如南京遣使如晉索吐谷
渾叛者三月乙卯朔晉遣齊州防禦使宋暉業據五代
史作光

鄴遼史蓋以
避諱改之

翰林茶酒使張言來問起居丙子晉遣使

進射柳鞍馬六月癸丑朔晉齊王重貴遣使來貢乙丑
晉主敬瑄殂子重貴立戊辰晉遣使來告哀輟朝七日

庚午遣使如晉弔祭秋七月庚寅晉遣金吾衛大將軍
梁言判四方館事朱崇節來謝其書稱孫不稱臣遣客
省使喬榮讓之丁未晉遣使以祖母哀來告八月戊辰
詔河東節度使劉知遠送叛臣烏爾古指揮使由燕京
赴闕癸酉遣天城軍節度使蕭拜姓如晉弔祭九月壬
辰遣使賀晉帝嗣位冬十月己巳遣將軍默赫特伐党
項十二月癸亥晉遣使來謝是冬駐蹕赤城

六年春二月乙卯晉遣使進先帝遺物辛酉晉遣使請

居汴從之三月己卯朔吳越王遣使來貢戊子南唐遣使奉蠟九書丁未晉帝至汴遣使來謝夏五月己亥遣使如晉致生辰禮六月晉遣使貢金秋八月丁未晉復貢金己未如奉聖州晉遣其子延煦來朝冬十二月丁未如南京議伐晉命趙延壽趙延昭安圖嘉哩等由滄恒易定分道而進大軍繼之是歲楊彥昭請移鎮柰樂及新鎮從之

七年春正月甲戌朔趙延壽延昭率前鋒五萬騎次任

丘丙子安圖入鴈門圖忻州代州己卯趙延壽圍貝州
州將邕珂開門納降刺史吳巒投井死己丑次元城以
延壽為魏博等州節度使封魏王率所部屯南樂丙申
攻黎陽辛丑晉遣使來修舊好詔割河北諸州及遣桑
維翰景延廣來議二月甲辰攻博州刺史周儒以城降
師自馬家口濟河滿達營於河東攻鄆州圍晉別將於
戚城晉主自將來拒滿達分兵屯河西遇晉兵與戰不
利辛亥晉定難軍節度使李彝殷自麟州來侵三月癸

酉及晉兵戰於澶淵大敗之壬午留趙延昭守貝州徙
所俘戶於內地夏四月癸丑還次南京辛未如涼陘五
月癸酉耶律巴哩岱奏破德州擒其刺史尹居藩秋七
月己卯晉平盧軍節度使楊光遠遣人奉蠟丸書辛卯
晉遣張暉奉表乞和是月晉襲飛狐大同軍節度使耶
律恭嚙擊敗之九月庚午北幸冬十月壬戌天授節諸
國來賀惟晉不至十一月壬申詔徵諸道兵以閏月朔
會於溫榆河北十二月癸卯南伐甲子次古北口閏月

己巳朔閑諸道兵於溫榆河己卯圍恒州下其九縣

八年春正月庚子分兵攻邢洺磁三州二月圍魏州晉

將杜重威率兵救之戊子晉將折從阮陷勝州

遼史勝州作滕

州誤也茲據通鑑改輯

三月戊戌師拔祁州殺其刺史沈斌庚戌

杜重威攻秦州戊子趙延壽率前鋒薄之己未重威遁

去追至陽城大敗之癸亥圍晉兵於白團衛村晉將符

彥卿等乘風奮擊大兵不利遂命旋師晉亦退保定州

夏四月甲申還次南京杖將士戰不力者癸巳如涼陘

六月晉兵襲高陽戍將擊走之秋七月乙卯獵於平地
松林晉遣孟守中奉表請和仍以前事答之八月己巳
詔侍衛蕭蘇色閱羣牧於北陁九月辛酉還上京冬十
月辛未祠木葉山十二月乙丑雲州節度使耶律恭噶
獲晉諜者

九年春三月己亥吐谷渾遣軍校蘇呼獻生口千戶授
蘇呼檢校司空夏四月辛酉朔吐谷渾白可久來附是
月如涼陁五月庚戌晉揚州戍將孫方簡請內附秋七

月辛亥詔徵諸道兵其故傷禾稼者以軍法論八月帝
自將南伐九月壬辰閱諸道兵於漁陽是月趙延壽與
晉將張彥澤戰於定州敗之十一月戊子進圍鎮州丙申
侯騎報晉兵至遣精兵斷河橋晉兵退保武強南院大
王達年將軍高模翰分兵由瀛州間道以進晉將梁漢
璋率衆來拒與戰大敗之漢璋死杜重威張彥澤引兵
據中渡橋趙延壽等擊敗之斬其將王清

遠史此下有
宋彥筠隨水

死之文考五代史冊府元龜俱云彥筠退走通鑑謂彥
筠浮水得免陶岳五代史補後漢乾祐中彥筠實為鄭

州節度使知道
史誤也今不取

重威等退保中渡寨義武軍節度使李
殷以城來降遂進兵夾淳沱而營去中渡寨三里分兵
圍之十二月丙寅杜重威李守貞張彥澤等率所部二
十萬衆來降授重威守太傅鄴都留守守貞天平軍節
度使餘各領舊職命御史大夫嘉哩監軍富珠哩及張
彥澤持詔入汴且召桑維翰景延廣帝留兵守魏自率
大軍而南壬申晉帝石重貴與其母李氏奉表請罪張
彥澤殺桑維翰給言自經死詔收葬之甲戌彥澤遷重

貴及其母若妻於開封府署壬午帝次赤岡重貴舉族
出封丘門橐索牽羊以待帝命改館於封禪寺晉百官
俯伏待罪命領職如故將軍康祥執景延廣來獻詔以
牙籌數其罪繁送上都延廣於道自殺

大同元年春正月丁亥朔備法駕入汴御崇元殿受百
官賀戊子以樞密副使劉敏權知開封府殺秦繼旻李
彥紳及鄭州防禦使揚承勳以其弟承信為平盧軍節
度使己丑殺張彥澤於開封市辛卯降重貴為宗祿大

夫檢校太尉封負義侯癸巳以張礪為平章事晉李崧
為樞密使馮道為太傅和凝為翰林學士趙瑩為太子
太保劉煦守太保馮玉為太子少保癸卯遣趙瑩馮玉
李彥韜將三百騎送負義侯及其母妻子弟於黃龍府
安置二月丁巳朔帝服通天冠絳紗袍登正殿設樂懸

儀衛於庭

謹按通鑑輯覽

御批遼當國勢強盛時經畧中原所過摧枯拉朽幾於大業
可成乃甫入大梁即襲用通天絳紗尋復呼仗入閣諸袍
從事捐浮麗而徇浮譽非間版所宜抑且背本不祥天道
厭之宜其未及旋轅遽櫻多故也其後全元昏惑迂生改

正易服之說茂桑舊章之
不旋踵讀史者可不戒諸

下制改晉國為大遼大赦改元

升鎮州為中京以趙延壽為大丞相兼政事令樞密使
中京留守賜百官將士爵賞有差辛未晉河東節度使
劉知遠自立為帝國號漢詔以耿崇美為昭義軍節度
使高唐英為昭德軍節度使崔廷勳為河陽軍節度使
三月丙戌朔以蕭翰為宣武軍節度使賜將吏爵賞有
差壬寅詔晉諸司僚吏嬪御宦寺方技百工圖籍歷象
石經銅人明堂刻漏太常樂譜諸宮縣鹵簿法物及鎧

仗悉送上京磁州帥梁暉以相州降漢已酉命高唐英
討之夏四月丙辰朔車駕發汴州以馮道李崧和凝李
澣徐台符張礪等從行戊辰次高邑帝不豫丁丑崩於
欒城年四十六諡曰孝武皇帝重熙三十一年增諡孝
武惠文皇帝廟號太宗陵曰懷陵

太宗天顯十一年

仍太祖
年號

會同九年大同一年凡

二十一年

欽定續通志卷四十一